



PREZIDÊNCIA KONSELLU MINISTRUS

VI GOVERNUN KONSTITUSIONÁL

DÍLI, LORON 12 FULAN-MAIU TINAN 2015

KOMUNIKADU IMPRENSA

Sorumutuk Konsellu Ministrus loron 12 fulan-maiu tinan 2015

Konsellu Ministrus hala'o sorumutuk tersa ne'e, iha loron 12 fulan-maiu tinan 2015, iha sala sorumutuk Konsellu Ministrus nian, iha Palásiu Governu iha Dili no aprova ona:

1. Dekretu-Lei ne'ebé aprova Orgánika Ministériu Agrikultura no Peska nian

Dekretu- Lei n.º 6/2015, loron 11 fulan-marsu, ne'ebé aprova Orgánika Governu Konstitusionál VI, reformula ona atribuisaun sira hosi Ministériu Agrikultura no Peska hodi refleto klaru liu ba política Governu nian ba setór, hodi reforsa liuliu ninia knaar sentráli iha protesaun no konsersaun ba natureza no biodiversidade.

Estrutura Ministériu Agrikultura no Peska nian ne'e mós iha flexibilidade, hodi garante koordensaun no artikulasaun ida ne'ebé di'ak hosi ninia orgaun sira, nune'e hadi'a di'ak liután prestasaun servisu ba públiku.

2. Dekretu-Lei ne'ebé aprova Férias Judisiál sira

Dekretu-Lei ne'e estabelese rejime ne'ebé bele aplika férias judisiál sira, hodi determina iha tinan-tinan katak, atividade tribunál sira nian sei suspende ba férias judisiál sira iha loron 1 fulan-agostu to'o loron 15 fulan-setembru, ne'ebé durante períodu ne'e, atividade sira urjente husi tribunál sira, sei hal'o liuhusi turnu. Nune'e fiksa ona períodu úniku ba férias judisiál sira, ne'ebé durante periodu ne'e, tribunál sira suspende sira nia atividadae, hodi garante de'it ba prestasaun servisu urjente no servisu hirak ne'ebé mak tenki halo kedas.

Diploma ne'e mós determina katak, majistradu judisiál sira tenki goza sira nia férias tuir regra no períodu ne'ebé mak hanesan ho férias judisiál sira no tenke organiza atu bele asegura servisu turnu nian.



Palácio do Governo,
Avenida Presidente Nicolau Lobato,
Dili, Timor-Leste

pcm.gov.tl@gmail.com
(+670) 33 310 608

3. Dekretu-Lei ne'ebé aprova Orgánika Sekretaria sira Ministériu Públiku nian

Dekretu-Lei ne'e estabesele no regula estrutura orgánika sekretaria sira Ministériu Públiku nian, ne'ebé mak define ona nia forma orgnizasaun, sira-nia kompeténsia, nia funksionamentu no kolokasaun nia pesoál (ofisiál justisa nian) ne'ebé prevee ona iha Estatutu sira Ministériu Públiku nian.

4. Rezolusaun Governu ne'ebé aprova nomeasaun membru sira Autoridade Rejiaun Administrativa Espesiál Oekusi nian

Diploma ne'e define katak Autoridade Rejiaun Administrativa Espesiál Oekusi Ambenu nian iha períodu dahuluk, kompostu husi membru na'in hitu. Sira ne'ebé hetan neomeasaun mak: Arsénio Paixão Bano, nu'udar Sekretáriu Rejionál ba Edukasaun no Solidaridade Sosiál; Leónia da Costa Monteiro, nu'udar Sekretária Rejionál ba Finansas; Pedro de Sousa Xavier, nu'udar Sekretáriu Rejionál ba Ordenamentu Territóriu no Kadastru; Francisco Xavier Marques, nu'udar Sekretáriu Rejionál ba Administrasaun; Régio Servantes Romeia da Cruz Salu, nu'udar Sekretáriu Rejionál ba Agrikultura no Dezenvolvimentu Rurál; Lusía Taeki, nu'udar Sekretária Rejionál ba Saúde; Inácia da Conceição Teixeira, nu'udar Sekretária Rejionál ba Turizmu Komunitáriu.

Pasta sira Planu no Infraestrutura nian, hanesan funsaun espesífika sira Prezidente Autoridade nian seidak distribui no aprova ona mós kritériu hirak kona-ba remunerasaun ba membru sira Autoridade Rejiaun Administrativa Espesiál Oekusi Ambenu nian.

5. Rezolusaun Governu nian ne'ebé aprova nomeasaun ba Komisáriu na'in tolu no Prezidente ba Komisaun Funksaun Públika.

Governu deside ona atu nomea Faustino Cardoso Gomes atu hala'o mandatu ida tinan lima, iha rejime dedikasaun eskuziva, hanesan Komisáriu no Prezidente Komisaun Funksaun Públika nian. Hetan mós nomeasaun nu'udar Komisária Komisaun Funksaun Públika nian : Maria Domingas Alves no Jacinta Bernardo, atu hala'o mandatu ida ba tinan lima iha rejime dedikasaun parsial nian.

Atu hanoin fali katak halo parte iha Komisaun Funksaun Públika membru na'in lima, na'in rua hili hosi Parlamentu Nasionál no sira seluk hatudu hosi Governu no husi sira hirak ne'e, Governu sei hili ida nu'udar Prezidente.

6. Proposta Lei kona-ba alterasaun dahuluk ba Lei kona-ba Lideransa Komunitária sira no Ninia Eleisaun

Alterasaun ba Lei n.^u 3/2009, lora 8 fulan-junu (Lei kona-ba Lideransa Komunitária sira no Ninia Eleisaun) ho objetivu atu garante viabilidade reforma nian ba kadru jurídku lideransa komunitária nian sira ne'ebé daudaun ne'e vigora hela, hodi fixa data eleisaun kona-ba lider Komunitáriu sira ba fulan-dezembu, hodi aumenta sira nia mandatu ba fulan rua tan. Define mós katak, Sekretáriu Tékniku Administrasaun Estatál

(STAE) mak atu propoin kalendáriu eleitorál, ne'ebé tenke aprova hosi Komisaun Nasionál Elisaun nian (CNE), to'o loron neenulu molok eleisaun.

Konsellu Ministru analiza ona :

1. Apresentasaun kona-ba konsesaun ba Portu Tibar nian

Modelu Parceria Públiku-Privadu nian, liuhusi konsesaun, aprova tiha ona hosi Konsellu Ministru, iha sorumutuk loron 2 fulan-agostu tinan 2013, hafoin remata tiha estudu tékniku sira no merkadu nian.

Konsellu Ministru analiza ona detalhe projetu, ne'ebé mak hato'o husi ekipa interministeriál, kompostu husi Ministériu Finansas, Ministériu Planeamentu no Investimentu Estratéjiku no husi Ministériu Obras Públika, Transporte no Komunikaun, ho kolaborasaun husi Kooperasaun Finanseira Internasionál (IFC- sigla iha lian inglés). Iha apresentasaun ne'e foka liubá antesedente projetu no estrutura PPP nian, kona-ba risku prinsipál sira , projesaun cash-flow, kustu projetu nian, benefísiu ekonómiku, aspetu ambientál no sosiál, desizaun sira ne'ebé mak persiza no perfil husi konkorente sira.

Dadaun ne'e elabora hela versaun finál Kontratu Konsesaun nian atu haruka ba konkorente sira.

Atu hanoin fali katak, infraestrutur ida ne'e esensiál ba nasaun ne'ebé mak prevee ona iha Planu Dezenvolvimentu Estratéjiku iha 2011-2030, no importante liu bainhira haree katak Portu Díli nian iha movimentu maka'as iha nível tráfégu tasi no mós tráfégu dalan nian.

2. Apresentasaun kona-ba finansimentu adisionál husi ADB hodi hadi'a estrada Díli – Tibar nian

Ekipa interministeriál kompostu husi Ministériu Finansas, Ministériu Planeamentu no Investimentu Estratéjiku no mós husi Ministériu Obras Públikas, Transporte no Komunikaun, hato'o ona ba Konsellu Ministru proposta kona-ba finansimentu adisionál husi Banku Dezenvolvimentu Ázia (ADB) hodi hadi'a no haluan tan parte husi estrada entre kapitál no Likisá nian. Projektu ne'e atuhodi hadi'a no haluan tan ba faixa haat ne'e, parte husi estrada entre Tasitolu no mós Portu Tibar nian, inklui mós konstrusaun ba rotunda.

Apresentasaun ne'e foka liuliu ba estudu viabilidade, perfil empréstimu no mós estrutura implementasaun nian.